

二酉尺牘十三





五嶽山人尺牘卷之十二

沔陽陳文燭王叔著

報蔡伯華職方書

足下詞倒三峽筆掃千軍海內傾慕久矣而不  
佞徃從朱秉噐游秉噐時時談之近過三山得  
足下雄作讀之諧如韶濩炳若龍鸞私心服焉  
見大雅何日乎明公簡命而南得主文衡夜光  
之寶連城之璧一一收之可謂無遺矣每語王  
汝存云假令今試士以詩卽八閩士孰逾王生





者而足下憐才下士款款于汝存亦蘇公于方  
叔故事也私心尤服之柰公期執掌偶有暑病  
而又遭亡女之痛相慕之深相見之頻而私秉  
未吐至今恨之明公惓惓相愛溢于眉宇此其  
情豈可與世人道哉異時掃匡山白雲泛洞庭  
綠波與明公大醉十日商千秋不朽之業延浦  
之劍其神必有合者荔枝考一冊呈覽聊爲側  
生解嘲耳博足下一咲

報劉達可學憲書

南都閩海尚可通問今借足下于滇關河得無  
脩阻乎然丈夫意氣相屬卽萬里一堂耳不佞  
官藩臬幾十有餘年見督學使者有專勅尚得  
行其志餘則旅進旅退而已足下文章節義爲  
江漢之光不佞傾心已久奉璽書而秉鐸不勝  
欣慰昔人謂胷中無奇山水未必能文卽能文  
亦兒女語也點蒼昆明非山水之最奇者乎足  
下收之胷中而發其素所畜者以明正學若金  
受礪若泥在鈞吾道南矣昔虞廷敷教曰敬曰



寬故勞來匡直輔翼振德音不迫也樸樸之詠亦云周王壽考遐不作人言以漸也徃江陵公更新學政其意甚美而奉行者專于嚴刻咸得上考不佞寬以行之雖不敢望古人萬一而強心以徇時好者薄而不爲至今巴蜀之士亦有亮其愚衷者况滇士質朴策而之道尤易爲力足下標其準的使知向往俾優游于春風時雨之中至執法以公品藻以明又足下餘事焉滇有孫公繼魯者曾視楚學其人博奧口六經如

流前不佞守淮悉其清操惠政又有李公元陽者曾守荊州其人玄遠深于禪學與不佞神交序其默游園草二公皆可祀于社者如未俎豆幸足下力舉之彰徃可以訓來亦鼓舞多士之一端也且二公著書滿家弟止見一班足下構全集便中寄之是百朋之錫也

報卓徵父光祿書

下馬空林入浮杯列嶂開足下從吾兒游乎山陰道中應接不暇自古記之矣夫游以益學學



以益詩詩以成名山川賢豪兩助焉讀本寧叙  
足下詩此心馳武林游太空樓上矣

報高念吾憲副書

龍壻膺左官荷明公保護兒瑩紹興又荷明公  
鞭策厚愛惓惓淪于骨乎新都難治甲于中原  
而明公清風惠政與會稽陶公並美無論異時  
崇爵埒宗伯而口碑燁然在祁山婺水之間故  
人愉快莫此爲甚便中敬謝高誼夜夢迢迢石  
樓雪竇矣

報蔡見麓大叅書

不佞常謂士君子人品既高則去後見思方來  
慶幸所謂風之也君子之德百世之師孔孟蓋  
惓惓焉明公入閩而閩重入楚而楚重即不佞  
未獲握手而洞庭衡岳之間恨來之晚尤私幸  
焉翰教寵頒所稱故人相見眼終青則明公曾  
次有陳生矣何計閩楚也它時把臂入林當悉  
吐之餘惟旌節早臨楚服不勝大願

報莊彥升秀才書



林登卿雅言足下才美覽佳稿益信乃知名下無虛士也得時而駕則供奉如令姪蓬累而行則山人如孔昭詩于足下何負此後可源源請教也

報林登卿太守書

不佞平生于詞客輒倒屣焉况莊生通家才且美乎昔人廣大丘而言其難周峻仲舉而病其少通不佞信通矣若周之似未也幸兄爲我謝莊生

報黃孔昭山人書

莊彥升來詢足下起居知坐詹侍御水亭僮僮然砥筆和墨作乾坤四大景矣外一字卷乃山陰徐天池書張陽和太史所寄不佞甚愛之乞足下大書舊作比于雙壁借此消殘暑耳

又

不佞有匡廬行矣足下大筆齋中作潺湲聲壯行色多矣游楚稿胡不見示叙而梓行業心許矣足下早教之洪都雁魚可來青原山下也



又

浦雲連鄂渚漢水到湓城家山差近耳乃足下  
詩中及之良爲一快不佞遊鯉湖登武夷而不  
見吾孔昭殊無逸趣佳稿當序而梓之登卿送  
不佞詩過于平日豈真同心之言耶足下爲我  
謝之

報李夢池憲副書

雲夢一區連爲蘄沔兩州相望維桑與梓比于  
間巷足下久鳴珂里中而音書未通則俗子之  
過也海內士人時時向不佞詢足下起居若以  
足下出處卜世道之隆污而中丞沈公道足下  
廣中之愛驩若膠漆得足下不啻增一右臂幸  
旌節早臨以慰之

報張幼于文學書

蘭亭舊蹟與足下釣臺新詩並至也讀之一快  
時時向道行使君懷足下不置吾家孔璋草檄  
便能愈疾如幼于一札令人翕然而起非耶方  
苦頭風報書不悉



報艾和甫光祿書

往使旌出川東弟方入川北及至浣花溪上遣使追送至十二峯頭而彩鷁遠矣昔人所稱兩岸猿聲啼不盡輕舟已過萬重山信有然者而弟一念懷私無緣達于左右今以前書呈上見鄙心切怛耳嗣會朱秉器憲長出兄西戍稿讀之至楚客江魚身可葬漢臣馬革骨猶香令人淚簌簌下及讀過六盤山四詩其氣雄渾與千巖飛瀑大壑寒風相爲爭勝然忠宣公以白首

兄以青鬢易地則皆然何意洞庭勺水間有兩砥柱乎語曰楚人失弓楚人得之兄前疏若爲楚重者視吳趙鄒沈諸君子尤爲奇異秉器亦言神游八極息以六月杯視黃河塊視崑崙其信然乎比聞太夫人仙逝兄以制歸矣太夫人遐齡見兄折檻而往足彰慈訓捧檄而歸尤慰倚門忠孝兩得焉知兄爲社稷珍重必能以禮御情也弟幸與兄同心少年附驥卽以文章自雄思託之不朽江夏樓頭長安客舍與兄津津



三曹國及牘 卷之十一 七  
者言猶在耳而無所進益覩兄篇翰所謂探驪  
龍先得珠者寧獨批鱗爾耶便中馳候近作附  
上一啖

報方君敬戶曹書

竟陵十詠讀之令人起舞與井丹公競爽每念  
夷戎榜中多文士以閩論之明公與黃給事矯  
矯矣楚中如吳明卿魏順甫高伯宗與先君子  
稱雄焉東吳如徐子與宗子相徐叔明西蜀如  
張肖甫陳于韶南海如梁公實林邦陽北海如

劉仲修河洛如張子畏陳晦伯陸道函洪都如  
余德甫曹有卿皆有聲藝苑者其子若長公李  
元甫李本寧與不肖後來特起而吾兩家者海  
內尤稱箕裘之業此世諦中快事也長公已陪  
學憲士林殷殷屬之使還報謝無倫惟長者垂  
宥

報黃亨夫給事書

方先生見雄文擊節焉乃門下見竟陵十詠乎  
定加賞也不佞叙先公榜中文士皆異地耳兩



公同巷吞吐烟雲衍衍相友古之荀陸無以加焉樂可知也冊呈上乞書大作以爲閩中二美萬玉山房詩旦夕課上矣

又

竟陵諸景旣得方君敬詠而又益以佳篇流風回雪落花依草兩先生之點綴麗逸似之乎天尺樓近體比五言更佳七澤蛟螭當並璽書護持矣王敬美轉南奉常門下望不肖拔茅茹以彙乎昔人評詩才有遲速者不佞謂仕宦似之

王次公真下水船不肖便是上水船矣博門下一咲

又

陳生逢瀛鄭生君傳其詩俱有情致讀之一快乃知河西善謳齊右善歌門下之功深於高唐淇水矣獨不肖文奏盈前無能請益人亦有言沈迷薄領書回回自昏亂古今人所痛大畧同矣謹此謝長者之教

又



弱冠而談班白而晤門下以爲隔世事信矣乃  
長者掃徑招侶肆意酣暢不佞才謝仲容老步  
兵以小阮畜之生平疇昔之感無如前會之奇  
且深者鯉湖拙記門下有見時耶點湖山多矣

報石介峯京兆書

不佞往讀明公疏草正直忠厚禪于國是心竊  
壯之及入閩部明公道履素重鄉國又見公子  
神宇翩翩將大勲名者當不惜齒牙餘論益信  
萬石君高風從來遠矣久欲布此私衷而鳳凰  
臺畔迥在天上敢因從者謝翰貺之辱惟明公  
垂照

報孫兆孺山人書

往足下南游結社淮上時程孟孺父子張羽王  
沈嘉則魏季朗咸在和歌之列此四五子者皆  
海內才可謂一時之盛其詩一編徐子與過淮  
曾諾爲序竟未得序其稿化爲烏有不佞入蜀  
絕域風乖久不聞問後以制歸則程博士下世  
其子過沔哭先公桂林四明東吳業有鴻鴈下



及江漢念舊游爲奇邁足下咫尺又通家莫逆  
柰何踈逃若是耶往會王引瞻于嘉州近會陳  
心叔于應城道足下津津不休嗣見王元美贈  
詩遊方城矣吳明卿贈詩遊下雒矣龍伯貞贈  
詩遊河洛矣足下遊日廣而詩日進高適暮年  
之工杜陵晚節之細往往如是足下新詩當有  
益于浮淮者昔鍾繇每閣筆于王粲君苗思焚  
硯于陸機不佞于足下得無有斯恐耶往不佞  
作公家漁人傳先公見之以爲足闡幽而傳遠

後元美亦有作想足下並刻之昔曹子建好人  
譏彈其文應時改定而獨許尼父之辭爲不病  
乃知今昔文人往往自喜恃濬發於巧心任受  
嗤於拙目即關中喬景叔致漁人書謂以張詩  
黃省曾張含方之擬非其倫愈光見其書大怒  
寓一札于喬曰吾詩何減于孫而子謬言之耶  
景叔唯唯謝此何啓圖魯言之相爲鼓掌大都  
習尚若此足下以二傳較之不佞視元美爲何  
如耶願足下教之近日楚中此道益不寂寞興



國之外鍾祥曾三甫京山李本寧德安劉長欽  
平江艾和甫麻城丘謙之蘄水朱子得同爲楚  
才暫皆家食振藻于黃鵠之磯高視于白雪之  
臺足下曾與之游乎屈宋杜孟楚風尚遠而以  
文章爲箕裘若吾兩家者似爲稀邁願足下懋  
之偶有連江丞轉貴邑令者以公家託之且言  
邑有高士設榻待焉附布區區非足下無以發  
吾之狂言也臨楮南望良憎悒悒

報游少澗比部書

方足下司理不佞共遊浣溪矣及擢廷中先後  
西春亭上頃奉 璽書而浙又握手三山間不  
佞遇足下何奇也夫民猶鹿也昔人等羅織之  
吏如獵者 主上祝網之仁過于成湯幸足下  
多所平反焉令先公有隱德而足下推之以霖  
雨蒼生猶龍哉隆中半榻圖如命賦一律幸足  
下教之武林秋早加餐自玉

報丘謙之太守書

足下不遠千里游武夷而訪弟也柰何遇直指



使者即還耶詩中別侍兒云瘴癘愁佔酒何人  
劈荔枝懷弟云就君飽荔子玉女凌輕烟豈不  
賢賢易色也詢之從者則燕姬已去楚妃在抱  
且聞雪兒之歌小蠻之舞兼于一身足下之急  
歸也有所戀耶至讀憶侍兒詩則夢裏天風石  
床曙色種種在目胡不效往年同到岫嶁頂耶  
南洗心年少有美質往語梁縣令命其主水簾  
洞毛子呆未之見也兩鍊師俱楚人從足下暫  
還楚乎倘返茲山異時訪焉足下有音書兩人

或可託也漳紗二端可作一帳俸金二十兩聊  
爲酒資歸帆過滕王閣幸致聲楊懋功久不聞  
問羅敬叔來胡不寄一字也詩序容課上

報沈全吾憲使書

明珠自還鱷魚遠徙門下聲華與昔人銅柱爭  
雄不佞欽仰久矣頃奉 璽書坐鎮溫陵不佞  
得朝夕倚玉此其愉快不言可知也專人奉迎  
萬惟台輿南指以慰群情

報魏南臺憲長書



二酉園文集 卷之三  
雨中得序佳刻豎子何能爲長者重耶往先大  
夫功業未就而海內相知幸其文采足垂永久  
倘見門下雄作其爲同舍舊游之快當何如也  
今游子有長恨矣

報馮源泉大叅書

往與奉常王公談太倉刺史以門下爲稱首謂  
中和樂職之布上追古之賢豪今繼王公者借  
重門下而中丞沈公尤以旬宣得人爲幸不佞  
欽慕旣久瞻對在即私心愉快豈獨壺公父老  
稱慶已耶專人奉迓惟早命台駕以慰群情

報袁太冲先生書

寧化主簿來門下華翰宛從天降至讀頌繫稿  
令人有沾衣者龍君善左官門下乃云口碑數  
千人之齒頰風流三千客之推轂何以得此聲  
于長者耶通家之愛不肖感淪于骨矣拙作爲  
小壻龍君善刻之新安門下所云二酉園集是  
也此中無副本所請益者乃近作耳惟批教之  
不肖祖居世恩堂右有井極其乃玉沙泉流派



扁爲上善亭取老子上善若水之意乞門下作  
一亭記豈惟江漢之光亦子孫之寶也

報馮文所學憲書

往在燕中與令姪咸甫交也知阿咸風度上比  
嗣宗業神交左右矣頃在武夷山中與王敬美  
談藝時及明公且謂明公爲五言長城間誦佳  
句一二真如子晉之笙吹落幔亭峯上也何快  
如之敬美又取西征集序讀之恨不見西征詩  
耳近袁履善先生爲蔣簿先容道爲明公之感  
乃敢付尺素道其私衷寧化使者能作致書郵  
乎卧游圖歌已到三山見公家小阮爲道區區

報游靜宇京兆書

河上舊遊日勤夢寐而况門下先後漕道雅稱  
莫逆乎昔人所云蕭朱結綬李郭同舟每有良  
風何常不嘆而音書阻絕三易寒暑坐俗吏羈  
束非敢自外于有道也門下慷慨天成經綸夙  
抱投之所向無不如意而乃令其拂衣抽簪邇  
者起用在大江之西者亦衆而淺淺東帛未賁



丘園海內士林莫不惜之非獨不佞一人之私而說者以武林兵變歸咎于藩司夫中丞獨坐之權至重也而徃徃願使諸司諸司惟其言而莫之違也成則居其功敗則分其過彼成安公真羝羊觸藩羸其角也于門下何與而况三年之艾五石之瓠公私倚于門下者如出一口即門下身在江湖之上其心居魏闕之下者耶近見一二相知談門下居京尹錫三代爵賞延于世是布衣之極耳而不佞以爲不然夫鴻之漸也于于于磬于陸于木及至于遠而其羽可用爲儀才品如門下內則八座外則三邊正門下之雲逵也旦夕漸焉茲同心者所愉快乎不佞留滯閩中亦將二載陸沉之羽不能奮飛門下以管鮑之交屬之即不佞曾次安能舍門下而別有知我者乎上杭一劄賢于十部從事遠矣乘便附布候私

報何小洛憲使書

郢上父老思明公旬宣之澤深于江漢見公子



佐郡欣然相告懷崇望峴南國有厚道哉昔漢  
家何武所去見思其後無聞明公之福厚矣莊  
將軍力爲推轂必不敢負長者之命

報戴梧臺太守書

往蜀中任司理行弟曾寓書于薇溪山閣滇雲  
萬里浮沉何可卜也比諗足下謝郡事返初服  
矣羅浮山色甲于中原而足下彩筆詠歌四百  
峯頭當增奇事况禎伯水部彥國廷評又在左  
右呼侶開尊有無方之益矣每憶吾榜中自館

職之外如崑山歸熙甫長洲袁魯望高郵龔子  
來南豐邵虛道候官林道翹晉江林登卿麻城  
丘謙之南陽方允治耀州左伯夏而南海則足  
下爲最此六七子者咸留心于竹素之業翩翩  
乎以風流自命追漢鄴下比晉竹林而近可參  
于中原五子之儔亦足豪矣回視世間蜂窠蟻  
垤之隘良足鼓掌耳山中佳况幸一推示之丁  
聘之與弟三人爲燕市長夜之飲把臂入林其  
樂孔嘉而大理已修文地下言之有足揮淚者



偶沙縣尹乃貴縣人詢起居無恙附此奉候并  
以近作請正

報劉雲嵩大尹書

明公清譽甚著柰何有訛訛滄滄者耶來教所  
云俗黠而構孽信有之矣息縣在汝水稱僻當  
天之中土風甚純厚不佞謂卓魯口碑千秋河  
洛亦中牟密縣之俗之美成之也明公勉旃加  
愛鴻軒鳳舉霄漢自騫無俟鄙人之贅也

報周大川憲使書

往在淮揚極承明公通家肉骨之愛感淪赤臆  
是時曾以嵩渚李先生集付選先君子思作序  
道門下雅意以報知己乃道駕既發未付剖劂  
十餘年來奔走岐路不遑私布念交情于生死  
感世好于疇昔意未嘗不在夷門吹臺間也門  
下瓊敷玉藻被金石而流管絃者足追李何之  
遺矣乃保大定功屹然遼左三軍之士皆如挾  
纊主上已賴門下爲長城矣昔人燕然石之勒  
狼居胥之封此門下旦夕事殊爲同心一快柰



何暫歸河山之陽也有道者出處固非淺陋所能窺獨淹芳芷於腐井棄雞駭於筐篋足爲世道慨耳有如單于背貢市盟牧馬塞上則門下長鋏錚錚鳴銷中矣幸門下早出授鉞一濟時艱燭才智庸下於世無所短長獨念門下家夢澤臺畔恥居王後之語便欣然操觚異時得片言與黃岡並傳庶無負門下知人之哲燭死且不朽矣幸門下便中鞭策之

報李渭濱光祿書

兩醉景延堂上此三十年前事而尊公下世先公爲位而哭不肖別足下且十餘年而令親周大川侍御按淮通家之情靄然在念嗣後奔走三巴八閩望大梁何啻天上乎獨聞令姪高捷令郎諸公子翩翩而起與空同大復二先生之後並駕中原良慰鄙懷便中奉候并以先公集請正有李先生墓碑外沔風集及湖上歌尊公曾加藻潤者海天清嘯集乃沔人潘子安詩尊公曾加批品者二書借觀仍還鄴架必不遺失



也何日過夷門登吹臺吊李先生墓一快生平  
乎臨楮依依

報莊彥升秀才書

何子應年遠謝拙文阿郎履祥文甚奇烈女未  
有祀乎天之報施善人者定矣承足下手教業  
與學使公言何郎從習太史遊矣登卿孔昭詩  
畫未就煩足下爲我促之

報郭青螺學憲書

往在淮揚時明公使中都留一二篇翰于大江

之北不佞讀之思寓書道嚮徃之私而使旌還  
舊京不佞亦制歸矣近在閩海與林邦陽徃還  
曾詢明公起居而邦陽道明公神交于不佞感  
不可言又思寓書并有請質于記室而明公以  
治行高等秉蜀中文鐸矣豈昔人所稱佇立想  
萬里沈憂萃我心者耶夫靈關玉壘二江三峨  
之勝見于相如所賦者似覺未盡而王褒揚雄  
陳子昂大小蘇其才甲于中原今山川人物猶  
故也而不佞向來承乏愧無以益之明公經術



詠歌海內具瞻當使山靈益奇人才益美而舊  
游如不佞與有榮矣不佞往于浣溪曾作草亭  
復灑西之舊創牛山之祠有草堂三記幸明公  
一修緝而表揚之令千古文人尚有生氣此明  
公餘事鄙言贅耳先公有四奇歌語蜀景也敢  
乞明公作入蜀四奇序豈惟先公之感漢唐諸  
名家永有賴矣幸明公少留意焉

報陳我渡大司寇書

不佞過留都入閩關兩有尺素奉候記室然浮

沉石頭城下未敢卜耳尤子大立來得門下手  
書因憶思所公在先大夫榜中與門下號稱莫  
逆砥礪廉隅門下位上卿矣尤先生恬退而逝  
初門之政一無長物而掛冠泛彭蠡湖幾于彭  
澤高風讀其道文質而不俚澤于仁義道德當  
于古人中率之者門下聞于不佞謂貧無以葬  
不佞稍稍致束芻之敬恨不生逢楚王表揚廉  
吏效優孟抵掌令孫叔敖子有寢丘之封乎閩  
中諸老落落晨星大司馬郭公近日謝世矣崇



爵遐齡如門下宇內更稀不在壺山溫陵間論也精神益爽壯猷益富明主特召旦夕且下殊爲通家後進一快也

報呼益齋總戎書

幕府清暇日與子初爲帳中飲乎寓書三山惠我酒卮明公之惠渥矣獨秋高馬肥明公定有北顧匈奴之懷若南粵有碩畫則金革消矣

報吳明卿先生書

近與王敬美談藝深服大作如五七言律學杜風骨而不襲穩處藏高且篇篇有致絕不雷同王子以爲與于麟作身後戰場未知鹿死誰手不佞謂鴻溝一割之後恐歷下生四面皆楚歌矣博門下一咲外不佞與敬美近作有梓爲雙龍篇者幸評教之

報楊章華憲副書

往吳山人陳將軍行俱有書上記室兩人行蹤未定卽前書投沉未卜耳每會雙臺林先生輒及門下與不佞少年比翼黃鵠之游暮雲春樹



未嘗不馳神于左右不知海岱仙吏曾懷三山  
故人否乎足下高標亮節表著士林 清朝大  
用以爲三楚山川之光不佞年今五十鬢日短  
而志日損足下尚少不佞數歲且英英壯也縱  
使與足下夢寐獲通安得今狀乎俟河之清人  
壽幾何言之增悵結耳林先生詩選第所校梓  
奉門下讀之亦知己者之一快也

報屠冲陽學憲書

不佞往守淮陰時明公使旌浮淮不以冗俗之

吏而納之交好同聲相應同氣相求有出於文  
酒之外者至今思之猶勤寤寐嗣後明公入典  
天曹而不佞奔走于蠶叢鳥道之間卽有珮玖  
之託蘭茝之思而山川間之顧望於邑徙倚爲  
勞知彼此同之也頃聞明公秉鐸齊魯不勝欣  
慰昔孔子觀魯樂曰洋洋乎盈耳哉吳季子觀  
齊樂曰美哉泱泱乎大風哉今得文雅如明公  
者而振之則齊魯之俗一變至道而禮樂可興  
道德可一自足風海內士習矣是三代之英而



洙泗之遺也至于秉公運明宣主上作人之化特明公餘事不足沾沾道也不佞嘗謁孔林登泰山矣秦封漢禪之跡金石絲竹之音猶然耳目以爲奇邁而况明公以一代儒宗過化其間此其愉快真登東泰者難爲山游聖門者難爲言乎功令所布品藻所錄幸明公一一推教聊慰故人離索之思而已

報方員外黃給事書

大司馬郭華溪公勲名三十年駸駸子儀矣乃風猷類林宗文筆類元振近日廉吏一疏足挽頽風士林亦嘆表儀長謝至請清朝恤典通家子當如尊教竭綿力贊之

報郭公子書

華溪先生仙逝矣昨與中丞談卹典謂尊公清議在士林洪伐在朝著生有令名沒有榮號中丞公首肯之且庚戌諸老自呂文簡公後名爵宜謚者莫如尊公今日之謚不謚雖未敢必乃清朝自當得之公論業已屬之若祭葬其餘事



耳方計部黃給事兩公寓書不佞情見乎辭不  
啻竹林酒鑪之嘆山陽鄰笛之悲也不佞亦心  
感之况賢伯仲乎餘惟節哀以襄大事

報溫益齋中丞書

去年走使武林持竿牘上記曹門下不彼而教  
之垂念庸劣有積薪之嘆自顧縮帶而交左右  
今二十年矣而芝蘭之契金石之好渾如一日  
有不可槩求之今人者及取所惠齊民要書讀  
之大都推衍聖訓以誨黔黎而倦倦于農桑之

業此神道設教之遺皇極敷言之旨而有孚孳  
如是訓是行者也即往年軍變于前民變于後  
非獨統御之疎以教化之弛也門下端其本矣  
而聞之道路口碑咸云門下去煩蠲苛勞來安  
集不遺餘力謙已虛懷又不却衆庶一二年間  
三軍之士恩同挾纊四境之內澤比陽和昔人  
謂孤山越絕天台鴈蕩皆上應台星超然秀出  
今頓還舊觀矣名賢作用亦有不可槩求之今  
日者頃見中原多故水旱頻仍主上止輦受



言門下石畫想入告多矣尚有秦越人禁方俟  
臨期而投之者與廟堂非久即召柄衡以維國  
是若不佞者真杞人之憂也門下亦憐其愚衷  
而鞭策之否乎

報丁元甫大尹書

華翰翩翩三到幔亭峯上世好如足下何得有  
兩也足下文章政事表表于黃山白岳之間前  
會一侍御公知新安事者謂不佞曰武昌武陵  
皆楚雙璧也其好文同好士亦同但武昌運之  
渾于無跡武陵出之似乎有意不佞以爲確論  
今足下惜武陵者殊深乃知好文與士其漸如  
此末世之難以古道行也回思不佞守淮時亦  
危矣恃足下知愛敢一布之秋夜懷人得扇頭  
一詩足下讀之得無曰應是我輩語乎

報張芝陽僉憲書

秋日讀明公大作如芙蓉初綻色色可愛三楚  
屈宋之後代有聞人何意歌故里白雪者在炎  
海間乎神超形越暑氣盡消王敬美去後無可



商此物者明公又遠在千里外日苦公期簿書  
承華翰知道體生熱毒秋涼自可勿藥附上近  
日拙律恨無孔璋草檄才可愈頭風明公讀之  
一咲或有起色也

又

不佞與門下同梓里而泛炎海何啻唇齒耶西  
江有役跋涉在卽且與門下解携矣人亦有言  
良友遠離別各在天一方參辰之感門下得無  
同乎門下雄才清節表著海上楚人旗鼓從此

樹中原矣願從令德厚愛景光

又

不佞至洪都閱月矣武夷山色與門下高情時  
形夢寐近得賈中丞公薦疏不佞與門下又爾  
聯名豈辰之丹砂與湘之蘭蕙世自有珍之者  
耶江藩公冗數倍于閩而不佞支持頗難稽中  
散所稱不堪者七古今人情大都相似矣門下  
肯一引手否乎偶眺滕王閣上控荆楚而引甌  
越又瞻戀于左右敢專一力候之不腆將忱聊



代雪夜命舟之興耳

報陳彥冲大尹書

不佞素有鯉湖之興及讀足下記翩翩神往若與九仙遊也武夷拙作何得與諸名賢並錄獨足下大書可珍耳郎君秋興諸作有杜法詢之從黃給事公遊乎父兄師友真其益無方也

報方子及郎中書

不佞平海視師鯉湖祈夢兼過冠蓋之里始知山川秀靈如足下者信有所鍾也太公長公皆

以愛足下者愛不佞乎又以足下所愛諸名公卷惠不佞自陸文裕而後若王伯安唐應德矯矯焉乃有舍親童士疇學士之作是日飲黃給事丈人共珍賞之給事曰此可謝子及席間談足下不休太公亦樂甚也是夜得李元甫祭酒書云金陵與子及醉三日乃別今足下榮滿過金臺或不止三日醉元甫也前見陪推滇中之報喜也欲狂豈以一學椽足重足下哉聊爲吾道增色耳幸足下加餐以膺新命



二酉園尺牘 卷之十一  
報黃金之山人書

足下非汪伯玉所稱誦法屈平左氏司馬而壹  
稟于六經奉三戒以周旋爲天吏而不至失隊  
者乎不佞有懷久矣乃伯玉三寓書焉而得與  
足下爲晤言之驪鯉湖志成足下無負于閩亦  
無負伯玉矣戚將軍血戰在興化者尤奇家祀  
而人祝之方山人景武有才情聞其老母尚在  
不佞欲傳大將軍戰功而銘方主墓幸足下詳  
其事一入會城望九鯉湖渾如隔世足下見彥

冲宗漢爲我謝之

報陳公望宗伯書

不佞觀大海遊鯉湖而與門下晤也有三適焉  
乃門下掃山亭而酌之泉聲淙琤自巖洞中出  
平生知己無如門下論心談藝一日千古高山  
流水之曲不啻鍾期伯牙之遇矣門下前言不  
佞于山水非獨勝情勝具亦有勝緣寧獨九曲  
三峨也碧山玉人足以當之賦得小詩四章懸  
之薜蘿令異時有姓名乎則不佞之緣果矣



又

天尺小樓辱明公佳章而尊公大聯公子雄筆  
一門之美弟何幸兼得也送行之作把玩忘疲  
河梁話又潭水情深令人有沾衣者即日發芋  
原舟中附謝餘惟明公加愛以膺大拜

報陳章閣進士書

淮海與令叔晤盖有道氣者今閩海又與執事  
晤阿咸風度肖嗣宗矣晝繡里門通家之快專  
人代候惟高明垂照

報陳近野大尹書

三山咫尺相知如足下不獲班荆道舊坐俗吏  
相迫耳竟陵一冊珠玉爛然倘滕王江上訝舟  
中有奇物乎是足下夜光之璧矣

報曹近陽大叅書

武夷玉女峯頭望巫山神女不在天上耶屢有  
音書投沉未卜知明公無遐心也台履萬福龜  
峯鵝湖伊邇三山美人在念終霄不寐便中謹  
此布忉怛之懷浣溪雲樹巴蜀故人一一無恙



否幸明公示之以慰舊遊

報龍伯貞少府書

不佞三寓洛中書閩中得九江一札耳豈真鴈  
鴻絕遠乎亡女不幸無能終舅姑之事痛莫可  
言矣君善才名燁然江左柰何左官乎讀汪司  
馬遺直閔世諸編可謂無負新都矣足下履任  
在即石筍雪竇之奇詞人所快足下新詩當日  
益也謹于幔亭峯上遲之

報閩中諸寮書

不佞叨尊庇出閩關矣寒風凜凜與三山異回  
思執事教愛真春風之和冬日之暖令遊子瞻  
念焉所幸洪都咫尺蔡戟匡山鴻鴈得頻頻過  
幔亭峯上也使旋鳴謝不恭統希高明亮之

報陳彥冲余宗漢書

前與兩公遊湖上山川之美應接不暇而文酒  
之樂交驩無厭昔人所謂婚嫁之願倘畢名利  
之心都盡者耶然兩公呼酒長嘯嘈然有聲雜  
銀濤中如數部鼓吹至今在千里外恨不佞爲



時羈紲耳鄙意見記中幸兩公有以教之

報李九我編修書

明公文章德器爲士品規海內欽慕久矣况兒  
璧叨附驥尾不佞竊祿名邦此其欣慰有百倍  
恒情者謹專人馳賀幸高明垂亮

報黃儀廷祭酒書

明公往在成均曾託舍親王南霍之子明公薦  
于年雅而厚之不佞憶友朋道廢即明公高誼  
推之無所不厚格天事業由于寸衷可以窺相

天下之度焉承乏名邦值明公予告梓里自幸  
見明公有期而簿書期會所羈不獲如願馳仰  
台衡形諸夢寐未嘗不在清源紫帽之間也

報費唐衢大叅書

明公才氣橫被六合即閩海如斗大何足煩明  
公石畫耶旦夕振纓千里之馬皆蹠躩而悲鳴  
矣幸明公攬轡俟之燭最黥淺遠違教席竊祿  
名邦多所沾溉天涯游子尚有私慶焉門下殘  
膏賸馥推示一二乃所以厚桑梓也



報林登卿太守書

弟入閩餘二年矣不得過寶晉齋觀米家書畫殊爲欠事兄北上過滕王江閣乎可話離索也

報方篆石員外書

湖山千里下榻高風門下所以望不佞者何殷也靖安尹旣爲明公所取士當如命厚遇之

報莊彥升秀才書

左史公故人茲行當握手一快足下雄才逸調有目者所共知友朋之道近則正之遠則稱之

所諭當如命力圖之不敢虛諾也見彥升何日耶臨紙依依

報林震西太守書

匡山典郡使君風流尚在五老峯前弟行當快覩之閩山詩草楚水茸棠故人期望愉快極矣

報林雙臺先生書

不肖已出分水關上思馬融之絳帳憶揚子之玄亭恍如隔世矣太夫人高節不肖幸得表其幽異代知門下有陳生者則三山之行或不虛



耳餘懷種種俟至洪都布之所許文稿千萬早  
教之臨楮西望無任依依

報宋桐岡方伯書

同袍兄弟把握最難閩省得雲谷兄江省得吾  
兄左提右挈宛然手足之愛弟一身當被之矣  
華翰屢下讀之再三亦有人言願一見顏色不  
異瓊樹枝鄙心之謂也吏還先此奏記室

報馬叔華秀才書

往讀足下時義已知翩翩鳳毛矣辨窮文及左

國諸書又何薦于好古耶司徒公有子矣名賢  
風韻在匡山蠡湖間苟可表揚後來者之責也  
况足下惓惓乎壽詩奉上張呂二公如命達之  
可往見而言鄙情知不虛諾耳三山咫尺努力  
相聞

報沈東霍學憲書

二十年前與明公談藝若昨日事雪坡草堂辱  
佳詠在一二年間曲彌高而和彌寡矣不佞珍  
感之匡山彭澤在明公襟帶品題益富當傾囊



以誨故人也握手在卽語不多談

報鹿門茅憲使書

八月間曾以尺書寓之紹興想入尊覽矣先時有惠明公白華樓三稿者讀之欽服語具前書中同安劉生至又得明公手教佳稿中云耿耿之懷獨懸千里之河而注之海也彼此同之矣明公才華冠世發之文章者雄深昌大睥睨一代所稱世之所競在于冶容鉛華羅綺明璫而明公所取獨在于仙肌玉骨倘南威西施作于

千載之後必謂明公爲賞音之士矣每讀明公上元峯相公書誦胡督府之勲報悟齋少宰書白陸司馬之事未嘗不嘆明公友道之厚至訟寃一書明公所以爲沂東憲使者至矣此皆三公身後之曲而明公以筆端直之非明公有良史才不能也業稍稍布于當事者世有滕公季布當無恙如魯朱家指矣不佞移官江省去茗嘗尤近從此頻頻往來得就正於大雅之側尤生平之至願也不知明公以爲何如



報董潯陽大宗伯書

前者寓書門下道平生仰止之懷及三世通家之誼辱門下賜之手教錫以佳貺而扇頭和章翩翩大雅下里之夫何幸與聞珍感珍感門下言善病類長卿公幹漳濱之態文園之渴千載而下何在茗嘗也然門下自狀頗悉其氣日以昌其神日以王關河修阻讀之使人鼓舞尚有起色不知面台光者更當何如柳宗元謂凡人好辭工書皆病癘也不幸蚤得之學道以來思

砭鍼攻熨以去而纏結心腑者牢甚斯須忘之而不克門下所云一搆思而面遂如赭一執筆而手亦若疲得無似之乎第騷鬯千里大鵬九萬驚風磨天門下有焉杜陵莊生有不能言者東郊榆枋非其倫矣每逢人詢起居咸言門下穿曲池築層榭羅繁花奇樹而歌童數輩吹竹揚絲其樂未央娛暮景而消壯心司馬公之獨樂園韓魏公之醉白堂無踰其盛也門下又言天有歎歲猶世有病人征科者宜緩其徵此老



臣憂國之忠也今天下困矣無論西北互市元氣以耗淮楚之水河洛之旱室如懸磬路有委骨卽 朝廷下賑濟之詔有司多不能奉行碩鼠之剌在在爲然不佞移官江右此中賦重而民貧日夕恐恐門下有長策當不吝指南也

報王冲宇方伯書

往者承明之廬叨附嘉會同袍兄弟極一時之盛少年意氣如足下尤所欽服二十年來勲名赫赫禮樂之在東曹經術之在河洛海內才類之士莫不誦之至風節在匡山蠡湖者第茲行有師承焉卽不與足下携手論心一謝疇昔纏綿之好而高賢作用綱紀四方者久而益彰自洽于同心過寤寐遠矣足下俯念故交加意并州能無誨乎臨楮不勝翹首

報吳韞菴憲長書

往明公持節溫處曾奉翰貺黃河舟中造次解携未申謝私後明公家居三年而不佞奔走閩蜀鴻鴈與中原絕遠亦未獲通于左右至今言



之未嘗不發汗沾衣也憶與明公綰帶而交雅  
相莫逆在大河韓山之間明公三仕兩浙今借  
重秉憲矣西湖天竺雁蕩天台俱宇內洞天  
之奇而明公清操惠政若與武林浩月赤城流霞  
並在天壤乃知杜當陽之沉碑于潭崔劔南之  
樹碑自朝不如明公之口碑在浙也况明公勲  
業進此而益遠乎故人愉快甚矣不佞叨轉江  
藩初擬過浙與明公爲良晤簡書是畏竟走豫  
章矣便中幸高明惠教千萬

報呂蒼南大叅書

不佞徃守淮安時詢鄰國循良輒以明公爲稱  
首十餘年而明公一晤結肺腑交比至洪都詢  
故吏檢遺牘而明公勲樹赫赫乃知名賢作用  
久而彌彰不佞有師承焉山樓一圖懸之座右  
南浦寒雲西山明月時時照護益知摩詰愷之  
諸君子品流高潔故落筆有神明公畫有仙氣  
矣增米家船之重焉

報陶雲谷方伯書



二酉園及牘 卷之十三 三  
二十年來同袍兄弟零落如雨乃兄與不佞幸  
在一堂弟迂踈固陋辱兄持繩墨而提携之砥  
礪以身推挽以心有兄不自知而弟知之者別  
來寤寐屢侍左右時而政本堂時而嘉樹軒時  
而百尺樓頭又時而平臺烏石之上矣昔人所  
稱寤而神交覺而形開又云夢因也想也弟之  
遇兄也豈真前緣耶役還布謝不宣

報周鶴臯方伯書

楚人仕宦在慶曆間顯者衆矣至進退以禮爲  
洞庭衡岳之光如明公者指不再屈况太公修  
齡明公色養風閭里而端教化明公張楚矣不  
佞承乏追明公之後周旋尊美堂上于孔門爲  
政之大旨不敢不勉圖之以前有明公在也差  
人奉候弁申私悃梓里同心弁州故國明公必  
有以教之

報張名川憲長書

不佞已至滕王江閣矣地靈人傑益信明公之  
鍾有自也太公家居清泰明公以盛年迎福祉



報國之日長矣高齋退食修竹錚錚有聲不佞  
祥刑數語惟明公足以當之徒倚懷人得無西  
顧耶

報金省吾憲使書

十載睽違偶得論心乃解携在即明公難別之  
情依依眉宇視文通賦別傷心南浦者不啻過  
之吏旋謹此鳴謝語不宣心

報李夢池憲使書

洪都諸公會問詢起居若以別門下爲太速而  
閩海諸公又以得門下晚也獨弟之相值兩不  
及于諸公乃心神相契有獨覺者不知門下以  
爲何如也

報趙肖軒比部書

湛泉公郢上之政比于召父杜母而一見明公  
風流文雅不啻阮謝竹林私心結通家驩矣每  
會明公欽恤之意本于由衷哲人惟刑無疆之  
休明公未有頌于閩海矣不佞殊爲并州蒼赤  
慶焉行時興貺寵席感淪心骨又不佞一人之



私也奏草便中乞早教焉

報蔡青門學憲書

天尺樓詩郢中再驚白雪不獨陳氏之寶也三楚有緣借重足下校文屈宋春陵可以復詞賦理學之舊乎竊于足下殷殷望之專力馳賀願言不悉

報陳文峯大司馬書

門下與先公莫逆不肖每會輒及之不曰貽以美醞則曰惠以嘉魚音問之勤亭榭之樂長者

惓惓口之若目前事交情生死不佞中藏焉一入洪都長者台光時形寤寐過瞻嵩堂食荔子丹對美人焦尚有日耶言之渾如隔世重增纏惓耳

報陳青田光祿書

閩中山水佳麗真稱福境而門下吐納風流聽者忘其飢疲疇昔文酒之會渥矣乃荷亭命酌情好綢繆汪淪送遠江淹賦別不啻過之門下弘才清望海內傾心廟堂特召旦夕且下不佞



在洪都洗耳聽之

報龍君贊孝廉書

不佞老而臨池足下惠我管城子佳甚昔人五色之夢三端之喻不啻過之足下栖雲六與君善息居當勉効一言初入洪都冗奪不果耳

報林師南戶部書

不佞往過壺公之陽明公道履在朝端不佞過南浦而明公使輶江州矣遙望清光瞻對尚遠匡山停雲之思蠡湖對月之懷未嘗不惓惓于

門下也謹專一力奉詢起居公期鞅掌語不宣心

報顧襟宇僉憲書

柱下英聲表著中外不佞仰止明公之日久矣初至洪都謂可即承台教乃華翰兩及驩次于面東望旌節在匡廬蠡湖之上恨不趨承左右祇興高山流水之思而已

報山陰王秀才杰書

不佞向禽名山之僻蓋天性也自五嶽外惟峨



眉武夷天台匡廬在念耳乃二游編得足下梓  
之茲行匡山矣異時扁舟山陰訪足下爲天台  
游不亦快事哉足下少年美才良晤有期張太  
史公序奇矣足下語次爲我謝之

報鄒龍望憲副書

明公守泉時不佞心服之如盛暑坐紫帽山中  
清風徐來也嗣明公秉憲不佞心感之又如寒  
冬時走溫陵道中無不可人意也別來馳想寤  
寐爲勞吏旋謹此代謝高誼握手奉大教尚有  
日乎海天在望無任依依

報馮源泉大叅書

奉晤台光未久乃荷明公之愛獨深傾蓋如故  
語不虛矣初至洪都計明公旌節巡宣矣紫帽  
清風經湖甘雨殊爲弁州父老快之

報顧道行學憲十四劄

謂米南宮畫中有書書中有畫非足下不能跋  
語佳矣綠端硯奇絕蓋宋品之佳者周公瑕有  
此足下見否容爲一贊勒下方願周旋左右耳



米帖承釋註臨池之興勃焉

又

往于徐子與處見文徵仲爲劉元瑞寫神樓圖而楊用修朱子价題焉世稱二絕門下畫筆清逸不減衡山而詩句俊雅寧出楊朱下耶兩餘展玩依依神往在百尺樓頭矣

又

五嶽圖佳甚豈惟鼓浪遊之興即卧游可耳足下曾中有丘壑哉

又

將樂公有善政民尸祝之矣而得足下爲之孫持文教而拜焉即中牟桐鄉未之有也古選擬謝與玉華洞爭麗靈運南亭玄暉東田不是過耳滄洲滿壁白練盈裙語更天然幸書一卷惠之

又

荔枝數顆竟不能留品物有西施乳西施舌者楓亭荔子核小而美可方西施足公可能爲側



生傳神如白樂天耶剡溪訪戴圖雪天逸興千載如新異時泛五湖叩松石齋者必陳生也附此布謝

又

足下曾次壘塊湏石以攻之玉華仙館松石軒二記自喜爲得意作足下以它山視之可耳請足下作松石圖見惠與米家研山圖並傳如何

又

居易文筆劉崇龜墨妙莫能圖也真勝畫耶今玩足下此幅朝夕在味無左輔忠即十八娘細骨楊貴妃香肌莫能比也畫勝真耶又品龍眼伯仲荔枝鄙意亦然曾質之王敬美敬美曰直堪作奴耳客有以側生旁挺比王家兄弟者不佞謂次公方並駕何堪此語客遂不言異時與二王談及當共鼓掌耳

又

昔王摩詰寫輞川莊妙盡山水李龍眠作陶淵



明圖雅意如生足下二酉園圖兩得焉當與茲山並存天壤矣及質甫能作盤礴齋圖惠我乎幸足下促之

又

不佞黃蓬山莊有橘數樹覽足下圖評心馳故園矣六王國錫而後貢神仙思之立致郭璞所贊惠連所賦多足下意乎不佞以爲灼灼麗日則美姬也耿耿凌霜則貞婦也節槩既殊風韻迥別吾其在荔子乎雲夢多柚不敢私于鄉土

江淮變枳不盡掩其瑕瑜蔡職方取香櫟足下取橘而欲班荔枝上不隨人妍媸者也不佞特爲側生解嘲云

又

昔陸探微畫稽叔夜像與仗曼容謂其相似也足下臨嘉祐壽星惠不佞乎無論修齡婆娑類圖中人卽酒量當進自是可飲七八斗博足下噴飯

又



翰墨往還遂成一段佳話不意三山門外天涯  
矣梁河握別誼高千古足下能爲圖又能爲詩  
俾蘇李驚吾兩人于異代乎願足下留意焉

又

玉冠束髮玉荔枝在手同心之惠迥異它人入  
閩稿當勉強一言前途寄上愧非玄晏何以重  
左思耶有便幸惠教以慰夢寐

又

世說新語補託子魯兄轉致各捐俸梓之幸足  
下命王生湛一校人非邢子才安取誤書之適  
也

又

弟已到江藩任矣子安序滕王者雄峙異代乃  
知古人文章與山川不朽願與門下共勉之入  
閩草倘梓耶幸惠教

報周國雍太守書

閩中久無報書苦乏便耳非故人忘我也吳孝  
甫至嘉陵江上耶計足下且入覲矣昔漢武帝



作栢梁臺詔群臣二千石有能爲七言詩者得上坐倘主上脩漢元封間故事如足下者幾人哉定以新詩被寵矣左選註刻有小序者便中希惠一部

報劉念廷憲副書

清源署中辱明公晤言之適尊酒話心一日千古曾具天素謝之今明公秉憲洪都矣匡廬武夷相峙若左右而三山鴈魚無緣達于彭蠡湖上人事鞅掌知彼此同之也聞明公入賀闕廷

中興之頌金鑑之錄當有比于徃哲者玉山令張子道深小兒業師處貧能安居官能廉諒明公必知其人鄙言贅矣

報凌以棟文學書

昔人慕茗霽山水者願爲浮家泛宅不佞尺素往來于公家兄弟也無乃似之乎金省吾憲使將入三山或可作致書郵矣

報薛道行光祿書

長安一別忽十年餘矣嗣後浮淮思過西原草



三臣園天牘 卷之十一 四  
堂吊尊公君采之墓又遭先公變不果行鄙心  
爲之忉怛曾憶足下許不佞李獻吉何仲默及  
顏惟喬手翰今邈不可得又聞爲李伯承盡收  
之然讀伯承爲尊公祠記鄙心爲之愉快也如  
有前三公書幸寄一二以全夙諾高賢冥居自  
困塵網把臂入林當在何日耶

報胥頤川憲副書

不佞兩度巴江見三峨三巘之勝甲于震旦意  
必有偉人當之又兩浮淮海見瓜渚狼山爲中

原要地意必得偉人鎮之乃明公以治郡高等  
召典兵戎而借于維揚旣爲蜀重又爲淮重而  
同袍如弟竊爲弁州山川一愉快也幾欲布此  
衷臆而三山鴈魚無緣達于左右月夕懷人清  
夢迢迢安知不在二十四橋之上耶

報麻十洲計部書

清江浦在淮上游而漕舟過後自公多暇如寄  
寄亭之晏大觀樓之登鉢池山之遊不佞往年  
浮淮從諸公邁之以爲生平極快况明公儒雅



風流當之翩翩欲僊乎即未攝明公後而風猷  
令問足爲淮海重矣茲者馮生世臣不佞門下  
士也不遠千里過訪武夷山中知明公有世講  
之誼託爲先容幸明公收之門墻感在不佞也

報趙心堂太常書

不佞承乏閩中兩辱明公手翰殊慰生平仰止  
之私及至三山而明公還承明之廬矣明公抗  
疏于朝則忠比長孺陳情于家則孝比令伯夫  
忠爲臣鵠孝爲子鵠閩士業有餘師矣而况明

公符采風猷有出于科條之外者乎每與王敬  
美道之知鄙言之非妄也頃者主上用明公出  
入周衛之中師師濟濟有不必褒忠以勸臣節  
旌孝以激人倫而士習世道咸有賴焉不獨明  
公一人之慶也不佞赳赳竊祿踰量兼之公冗  
久未申謝便中布其向往惟明公垂照

報王汝存秀才書

水日舟中與足下別黯然銷魂及至南浦驛而  
離緒尚依依焉念足下者深矣此中王孫一二



能詩者坐文奏盈前不遑請謁而余德甫先生  
又謝世欲語誰從顧長康所謂不欲作老婢聲  
耳公家子安滕王一賦屹然江上旦夕能鼓我  
逸興又似與足下晤耳世說新語足下早校之  
無負敬美與吾兩人託可耳

報林天迪文學書

霍僮爲宇內名山近在福州而不獲一登足下  
才美似之乎醉中所云千秋萬歲後爲洞主者  
幸勉圖焉江流入海別意與之俱長桃花潭水

不足言也四尚書傳如命勉成寄上昔人有言  
荷旃被毳者難與道純綿之麗密羨藜含糗者  
難與論太牢之滋味不佞之謂也幸足下教之

報徐曾源憲使書

易簡軒記懸之西江公署比于常絃不佞終身  
誦之矣西江理學淵源有自而明公向來過化  
所發明者赫赫若前日事獨平臺烏石與明公  
握手話心又渾如隔世矣此其悵結可與世之  
交游者同日語耶



報林仲山憲副書

先君子少日辱康懿公之愛比守職方與學士  
公交不佞于明公可謂世好矣乃明公雅流弘  
器不忝名家至南國其棠歌勿剪郢中白雪和  
應難之句所謂不意求嘉之中復聞正始之音  
者別天迪舟中擊節賞之阮謝風流昔人寧專  
美耶明公英年壯猷聖主當虛席以俟所願明  
公加飡以膺特召耳

報袁洪溪巡撫書

彭城舟中獲晤言之適至今台光猶在寤寐間  
也中原多故仰借門下而門下貸置蠲負者不  
遺餘力昔人稱庾文康爲豐年玉樨恭爲荒年  
穀乃門下兼之矣貴鄉年穀不登民有菜色中  
丞公亦以疏入告明主矣守土之吏如不肖宜  
如何以賑貸之瞻望大教愍如調饑門下爲桑  
梓當不吝藥石也

報陳靜庵憲副書

第與門下同袍有兄弟之好而高名又與賤名



三酉園尺牘 卷之三  
若出伯仲之行會記在西曹出入馬首會屢及後門下借重柱下史而第一麾淮陽音問遂不相及嗣漕道入淮聞門下以正直暫歸梓里門下英標偉度時時于夢中遘之昔人有言深源不起如蒼生何恐門下不久當膺特召此意亦時時與海內士林共話之非獨同榜一人之私也手教遠頒驪次于面聞驚座之談下仲舉之榻更何日耶臨紙依依

報朱訥齋進士書

太公與先君子莫逆交而不肖又辱國士之遇即告文所陳一言一淚不足以達衷悃而舒情素也明公弱冠登朝文章德業表著宇內所謂司馬談沒而子長繼班掾逝而孟堅出者也高文佳詠竊窺一二真足名世矣幼溪中丞千里會葬有古人素車白馬之誼不佞心竊高之而渠云不佞與門下可論心而談藝不知不佞于公家世誼何減長樂即請益于門下何待中丞語耶附聞記室見私心之忉怛耳



報徐華陽中丞書

去年大竹主簿廖子之便曾具尺素奉候門下  
投沉未卜嗣讀門下報功之疏西戎即叙明主  
豫悅即漢丹書衛鼎晉鍾所勒洪代何以加焉  
異時與武侯勲樹並峙于銅梁玉壘之間矣不  
肖承乏江藩緣此中水災亦甚力苦不支門下  
以天下爲度即日內召持衡所以爲中原長計  
以裨國是者籌之熟矣肯一推教否乎行都司  
斷事錢子梁不佞門下士也偶以用兵督餉建

昌事竣倘疏薦焉感德當無涯矣

報楊浣洲博士書

足下三禮名家大魁七蜀英標偉度時時于夢  
中邁之華翰惓惓故人高誼射牛斗之墟矣岷  
縣爲丹池洞天其才當不減山會乃科目少遜  
焉或教使然也足下才美學富萬令君又文雅  
可興教化者足下留意訓迪俾此邦人才日盛  
增東南之美是區區所望于有道也使還鳴謝  
南浦片雲馳神于越王臺上矣



報蔣紹虹太守書

乙丑之春得附高賢榜末是時門下弱冠登朝  
英標如玉又得成山人仁卿談藝把臂入林號  
稱莫逆後成子謝世而門下翱翔東曹禮樂是  
司第奔走蠶叢鳥道之間每會邵古愚兄輒詢  
起居萬福未幾而古愚又謝世遂與門下鴈魚  
阻絕非敢自外于同心也頃者承乏西省門下  
朱轡皂蓋近在咫尺坐嘯清風褰帷茸雨被潤  
于大江之西殊爲故人愉快獨匡廬離夢時時  
在昌山武水之間不知門下亦有西顧之懷否  
乎

報紀旭仁州判書

別足下十年餘矣而足下新詩富而益工如小  
園十二詠真爲江漢之光方擬登滕王之閣下  
孺子之榻而初至貴鄉吏事煩黷未遑請益稽  
康謂其不堪張敞嘆其無奇故人愛我當必有  
以憐之

報萬續溪大尹書



大江之西爲理學淵源之所無論鹿洞鵝湖卽  
鄒文莊羅文恭二先生足衍流派今見尊公所  
論著比于胡子居仁不佞有忒問之敬矣因託  
府中表其間曰理學貞士明公早承家學一以  
生平布之百里洋洋清譽在丹池鏡湖之上尊  
公未究之業顯焉書貺遠頒通家之愛溢于楮  
墨會不佞初至貴省吏事煩促嗣當圖請益也  
報鄒穎泉方伯書

往先君子與文莊公往還真道義肉骨之愛嗣  
締交門下握手談心比于古人使輶曾過復中  
書院倡明正學至今漢沔之間宛然有洙泗之  
遺皆公家父子有以風之卽先君子託之不朽  
矣兒曹得附公子榜末而翰教及之且賜明道  
一錄退食捧誦卽未執經于文莊公之門而陽  
明先生良知宗旨若揭日月而中天乃知大公  
者天德順應者王道皆自慎獨得之往寄先君  
子數語不肖已梓爲座右之銘呈上記室見一  
念嚮往之私耳門下進此而有教之者乎使旋



附布區區

報蕭夔南少叅書

山樓載酒水亭更酌至露零星稀猶未已焉曹公與門下雅情可謂江漢風流矣別來夢寐遘之而華翰惓惓麻姑酒尊飲之如對清光昔人有云勝公榮者不可不與飲不如公榮者亦不可不與飲是公榮輩者又不可不與飲也門下以爲何如

報周耿西憲副書

往于吳孝甫處讀明公震旦遊稿序曾齒及不佞又于顧道行處時誦明公不休可謂人遠而精神近矣子昂帖寄之何處至今夢寐思遘之耳建昌之轉文經武緯明公勲樹從此重雪山矣

報房心宇憲副書

不佞素欽門下才望識韓之願御李之懷往往有之頃者天幸借重門下洪都秉憲匡山祥雲蠡湖明月待使旌久矣幸門下早駕台輿以慰



士民之望臨楮不勝翹首

報魏季朗博士書

不佞語具前書中李元甫司成最憐才與足下  
魚水矣不佞老而倦游文章功業兩無所成往  
往以如意打唾壺尚有仗櫪千里之志乎幸足  
下教之

五嶽山人尺牘卷之十二





